

Polisnan involucra den tiroteo fatal suspendi

Manera ta conoci diadomingo ultimo den oranan di mainta un tiroteo a tuma lugar, caminda un hoben, A.C. Lanoy, di 19 aña di edad a fayece despues di ser alcanza pa balanan policial. E caso aki a causa un shock den comunidad completo cu ta haci yamada pa un investigacion husto.

Mediante un comunicado di prensa Ministerio Publico (OM) a informa cu den un investigacion penal manera esaki, den cual e polisnan ta involvi den incidentenan di violencia cu ta termina cu morto, practicamente semper ta tuma lugar un investiga-

cion independiente di Land-srecherche di Aruba.


Segun OM despues di e incidente fatal aki mesora Land-srecherche a cuminsa cu un investigacion penal bao guia di fiscal di husticia. E polisnan involvi a ser scucha den calidad di sospechoso y a ser prohibi entrada den wardanan di polis pa e duracion di investigacion.

“Ministerio Publico sa y ta consciente cu e tiroteo tin impacto grandi riba comunidad di Aruba. Pa e motibo aki, pa mas leu cu e investigacion ta permiti, Ministerio Publico lo percura pa informa regularmente tocante e investiga-

cion y tocante e adelantonan den e investigacion,” OM a declara.

Riba rednan social ta circula un video di un camara di seguridad di un cas den bisindario den cual por scucha e cantidad di tironan, 18, cu polis a tira, cual ta un di e puntonan cu comunidad mas ta cuestiona.

Famia di e victima y comunidad completo ta pidi pa e investigacion ser realiza di un forma parcial y cu resultado por duna contesta na e tanto preguntanan cu tin alrededor di e suceso tristo aki.



Segun CAft: Maneho financiero na Aruba no ta na ordo ainda

Recientemente Colegio di Supervision Financiero di Aruba (CAft) a publica su conseho tocante e Uitvoeringsrapportage (UR) pa e di tres kwartaal di 2024. Den su conseho CAft ta indica cu aunke e proceso di presupuesto di pais Aruba ta cana bon, e uitvoeringsrapportage y informacion di responsabilidad ta ser entrega structuralmente laat.



Primeramente CAft a resalta cu nan a ricibi e di tres UR di Aruba pa aña 2024 dia 27 di januari 2025, cual tabata mas cu dos luna laat despues di e fecha limite legal, cual tabata 12 di november 2024.

CAft a indica cu basa riba e di tres UR aki, nan ta anticipa un surplus financiero di mas cu 300 miyon florin pa e sector colectivo. Esaki ta suma na aproximadamente 4% di e producto interno bruto (GDP), cual ta hopi riba e norma di 1% di GDP estableci.

E Colegio ta remarca cu awor Aruba tin suficiente recurso pa sigui reduci su debe, cualnan ta subraya ta importante pa absorbe shocknan economico den futuro. Ademas, nan ta agrega, e ta conduci na pago di debe pa un reduccion di e gastonan di interes, cu na su turno ta crea mas espacio presupuestario pa otro gastonan necesario.

CAft ta subraya cu Aruba ta sigui keda hopi atras den e suministro di informacion di implementacion y responsabilidad. Nan ta señala cu e falta di informacion actual ta mina e realidad di e pre-

supuesto. Pa motibo CAft ta indica ta esencial cu e maneho financiero ta ser mehora structuralmente.

Saldo financiero
CAF ta indica cu e saldo di financiero di e sector colectivo na final di e di tres kwartaal di 2024 ta suma na 518 miyon florin (6.8% di GDP). Cu esaki ta spera cu Aruba tin un surplus, riba base anual, di acuerdo cu e di dos amienda di presupuesto 2024 (BW) adopta di 3.2% di GDP.

A pesar cu e beneficienan di e pais den e BW a ser aumenta caba, CAft ta spera a base di e di tres UR surplusnan mas halto den e Seguro General di Salud (AZV), Banco di Seguro Social (SVb) y Aruba Tourism Authority (ATA).

Ademas CAft ta spera un surplus financiero di 4% di GDP pa e sector colectivo, cual lo ta mas o menos 75 miyon florin mas halto cu loke a ser presupuesta. Esaki ta enfatisa e importancia di finalisa e proceso pa loke ta trata e uso di e surplusnan na AZV y SVb pa pago di debe, teniendo na cuenta e obligacion le-

gal pa mantene un reserva.

CAft ta destaca cu door di usa e surplusnan aki, e debe por ser reduci cu por lo menos 100 miyon florin.

Proporcion di debe
E debe di e sector colectivo tabata suma na 5,608 miyon na fin di september 2024, cual ta equivalente na 74% di GDP. CAft ta señala cu e proporcion di debe a aumenta un poco compara cu e di dos kwartaal di 2024 pasobra Aruba a ricibi na september 2024 prestamonan for di exterior di 242 miyon florin. Den e ultimo kwartaal di 2024, e debe ta baha debi na pagonan bek.

CAft ta indica cu Conforme cu Codigo Civil, Aruba lo paga bek 173 miyon florin den 2024. Como resultado di esaki e relacion di debe a alcanza 71% di GDP na fin di 2024 y cu esaki e relacion di debe a casi yega 70% di GDP.

Gastonan di personal
Pa loke ta gastonan di personal, CAft ta splica cu gastonan di personal a alcanza 6.2% di GDP na fin di september

2024. E Colegio ta premira cu Aruba, apesar di e aumento di gastonan di salario pa motibo di indexering, den 2024 lo cay bou di e limite di 10% di GDP.

CAft ta indica cu con e gastonan di personal lo desaroya te cu 2027 (ora e limita ta aplica) ainda no ta cla. Pa haya un miho bista di e desaroyo aki, e Colegio a splica cu un calculacion di varios aña di gastonan di personal necesario y a conseha pa procesa esaki den e presupuesto 2025.

Costo di interes
CAft ta splica cu e gastonan di interes ta suma na 194 miyon florin na fin di e di tres kwartaal di 2024, cual ta equivalente 62% di gasto compara cu e amienda di presupuesto. E Colegio ta resalta cu sinembargo e centro di gravedad di e pagonan di interes ta den e ultimo kwartaal di 2024.

CAft a señala cu pa 2024, Aruba ta premira gastonan di interes di 316 miyon florin, cual ta equivalente 17% di e presupuesto. E gastonan di interes halto, e Colegio ta indica, ta limita e flexibilidad di presupuesto nacional. Nan ta agrega cu e desaroyo mas leu di e gastonan di interes ta altamente dependiente di e tasa di interes (Mericano) y e resultado di e negociacionnan entre Hulanda y Aruba riba un cuadro di supervision nobo.

CAft ta resalta cu pagonan ta keda importante pa motibo di e gastonan halto di interes. Ademas, nan ta indica cu por yega na un acuerdo riba un

cuadro di supervision nobo den combinacion cu e uso di e surplusnan den e otro entidadnan pa provee alivio substancial di interes, mas o menos 100 miyon florin di spaarmento na 2029.

Inversionnan
CAft a splica cu nan a tuma nota cu na fin di september 2024 solamente 7% di e presupuesto di inversion a ser usa. Motibonan pa esaki ta inclui un scarsedad di capacidad den sector priva cu mester implementa e proyectonan di inversion y capacidad limita den servicio di gobierno.

E Colegio di Supervision ta remarca cu ta importante pa traha un agenda di inversion di varios aña. Esaki por yuda den e uso efectivo y eficiente di recursonan di inversion.

Maneho financiero
CAft ta enfatisa cu e maneho financiero na Aruba no ta na ordo ainda. Nan ta subraya cu desde 2021 e Uitvoeringsrapportages a ser entrega structuralmente laat y informacion di responsabilidad ta keda atras.

E ultimo cuenta anual ta di 2019 y CAft ta enfatisa cu Uitvoeringsrapportages na tempo y cuentanan anual ta esencial pa fortalece e ejercicio di e podernan presupuestario di e Estadonan.

Nan ta menciona cu den e rapport recien di Algemene Rekenkamer Aruba (ARA) tocante e cuentanan anual di 2019, ARA ta subraya e necesidad di mehoracion structural den e parti di maneho financiero.